

Á MESA DO PARLAMENTO GALEGO

O Grupo Parlamentar da Alternativa Galega da Esquerda, a iniciativa dos seus deputados **Ramón Vázquez Díaz, Xabier Ron Fernández e Yolanda Díaz Pérez**, e ao abeiro do recollido no artigo 147 do Regulamento da Cámara, presenta a seguinte **interpelación**, en relación co acordo bilateral de aplicación da LOMCE asinado entre o Goberno do Estado e o Goberno Vasco

A aprobación e posterior desenvolvemento da LOMCE provocou un importante impacto e rexeitamento social, manifestado por todos os membros da comunidade educativa e polos colectivos e organizacións representativas do ámbito educativo. Varias Comunidades Autónomas, entre as que non se atopa Galicia, teñen presentado recursos de inconstitucionalidade facendo valer as súas competencias en materia educativa.

O pasado 29 de setembro de 2014 o BOE publicaba unha resolución pola que se daba a coñecer o "Acordo da Comisión Bilateral de Cooperación Administrativa do Estado-Administración da Comunidade Autónoma do País Vasco, en relación coa Lei Orgánica 8/2013, do 9 de decembro para a Mellora da Calidade Educativa, (LOMCE)".

Co devandito acordo, o Goberno do Estado recoñece de forma explícita que as transferencias autonómicas en materia de Educación permiten definir ao Goberno do País Vasco diferentes aspectos da LOMCE. Uns dos recoñecementos fai referencia á potestade das Comunidades Autónomas a establecer a relación entre as direccións dos Centros Educativos e os órganos colexiados e de Goberno destes, que permite modificar as competencias destes órganos sen as limitacións que a LOMCE establece nos Consellos Escolares de Centro.

Queda claro deste xeito que a LOMCE non pode servir de escusa para recortar as competencias dos Consellos Escolares nin, como consecuencia, limitar ata reducir a meramente consultiva e testemuñal, a participación das ANPAs e dos membros en representación das familias, segundo mandata a Constitución Española, no seu artigo 27.

Por outra banda, dito acordo entre o Goberno do Estado e o do País Vasco recoñece a potestade do Goberno do País Vasco a definir o uso das linguas oficiais da Comunidade Autónoma nos centros educativos. A LOMCE non pode limitar a carga lectiva que se faga na lingua propia da comunidade autónoma, como acontece no caso de Galicia e a súa lingua propia, o galego, tal e como establece o artigo 5.1 do Estatuto de Galicia.

Prodúcese pois coa sinatura deste acordo, un evidente agravio comparativo entre a comunidade educativa do País Vasco e a de Galicia posto que as competencias educativas transferidas a ambas as dúas comunidades autónomas non difiren substancialmente nestes aspectos.

O Goberno do Estado recoñece implicitamente a inxerencia que a LOMCE supón sobre as competencias educativas da nosa comunidade autónoma e é un recoñecemento tácito de que hai causa legal nos recursos de inconstitucionalidade que varias comunidades autónomas formularon contra a LOMCE.

Recentemente a Confederación Galega de ANPAS de Centros Públicos remitiu un escrito ao Goberno Galego e ós Grupos con representación no Parlamento de Galicia, dando conta do acordo referido acordo e reclamando, en representación das nais e pais de toda Galicia, unha actuación para defender as competencias educativas do noso país.

Por estes motivos o Grupo Parlamentar de Alternativa Galega de Esquerda, presenta a seguinte INTERPELACIÓN:

- Que valoración fai Goberno Galego do Acordo da Comisión Bilateral de Cooperación Administrativa do Estado - Administración da Comunidade Autónoma do País Vasco, en relación coa Lei Orgánica 8/2013, do 9 de decembro para a Mellora da Calidade Educativa, (LOMCE)?

En Compostela, a 11 de marzo do 2015.

Asdo. Ramón Vázquez Díaz

Asdo. Xabier Ron Fernández

Asdo. Yolanda Díaz Pérez

Asinado dixitalmente por:

Yolanda Díaz Pérez na data 11/03/2015 12:07:12

Ramón Vázquez Díaz na data 11/03/2015 12:07:16

Jose Javier Ron Fernandez na data 11/03/2015 12:07:22